

四庫全書

集部

欽定四庫全書

集部

雲林集卷二

評校官中書_臣李彤

侍讀_臣孫球覆勘

總校官編修_臣王燕緒

校對官編修_臣吳壽昌

謄錄監生_臣周紛

欽定四庫全書

集部五

雲林集

別集類四元

提要

臣等謹案雲林集六卷元貢奎撰奎字仲章宣城人官集賢直學士追封廣陵郡侯謚文靖李黼為之狀馬祖常奉敕撰碑皆天下重望也所著有雲林小藁聽雪齋集青山漫吟倦游集豫章藁上元新錄南州紀行凡百二

十卷明永樂間徵入祕府家無副本惟雲林
小篆宋濂所序者尚存裔孫蘭家洪熙中三
山陳嶢復序而傳之後弘治間其曾孫元禮
復采諸書所載奎詩及遺文附益成編是為
今本奎詩格在虞揚范揭之間為元人巨擘
王士禎居易錄論其境地未能深造殆專以
神韻求之歟吳澄跋其文稿稱其溫然粹然
得典雅之體視求工好奇而卒不工不奇者

相去萬萬惜今不可得見矣卷末增載見婦
人偶興二首鄙俚穢褻必委巷附會之語而
元禮誤入者今並刊削焉乾隆四十五年五
月恭校上

總纂官臣紀昀臣陸錫熊臣孫士毅

總校官臣陸費墀

雲林集原序

夫人有一心統乎性情性則涵理而靜情則感物而動
情有喜樂哀憤好惡故發而形於言言之不足而至於
嗟歎詠歌自然有聲音節族之可聽而謂之詩稽之於
古則然矣豈獨後世有詩哉是故唐虞三代之時老人
有擊壤之歌童子有康衢之謠卿雲南風至臯陶之載
賡五子之感怨箕子之麥秀無非詩也至周而詩極盛
其三百篇則經仲尼之所刪而存者先儒謂刪後更無

詩者非無詩也謂雅不作耳自時厥後一變而為楚騷
屈原九歌則涉於怨懟宋玉高唐則流於荒淫至再變
而為漢之五言三變而為七言繼而歌行雜體後人多
以是相慕效而作各極其所至為名家自建安黃初以
及盛唐晚唐由宋至元作者迭出其有名公達官所撰
雄詞傑句往往為人所採輯梓行於世或有為子孫所
珍藏閱而不顯者亦多有之是殆不如山林處士釋老
之徒其文字反得託諸汗竹以傳甚可慨也洪武乙亥

余始領教宣城嘗遊柏山吊聖俞梅先生之墓得其後人所抄詩藁首末殘缺不完心甚惜之及考歐陽文忠公文集中所為序云得其餘藁千餘篇并舊所藏掇其尤者六百七十七篇為三十五卷以今較之十未得一耳可不為深惜哉於是復聞南湖翰林學士仲章貢公其子尚書師泰公父子並顯於元盛之時思欲訪其故居以觀其子孫所藏遺藁為廢於職竟不獲造竊以為恨及入教國子之廿年歲在甲辰秋七月既望其三世孫

有曰蘭字斯馨者以公事遊南京謁於橋門官舍持所錄二公之神道碑墓誌銘及詩藁一集來示始知公家世出處之詳公諱奎字仲章父士濬其人敦厚質直以勤儉起家嘗曰富以力者苟得必易覆以德者難効必致遠故其積有恒產雖豐裕而不妄費務賑貧乏作義塾以恤鄉里以教示姻子弟仲章公幼時士濬公愛之甚於諸子嘗曰三郎和易端重穎悟過人吾世有蘊德發必在是兒也及壯讀書甚勤於經史子傳無所不治

於文章辯義閎放雋瓌不狃卑近必以古為師自是以
文學發身始授池陽之齊山書院山長尋徵赴吏部至
德六年中書奏授太常奉禮郎兼檢討九年遷翰林國
子院編修官至大德六年轉應奉翰林文字預脩成廟
實錄丁秘書府君憂延祐元年終制除承事郎江西等
處儒學提舉五年遷翰林待制修成廟實錄書成特賜
金帛至治九年謁告歸里第與兄仲堅甫奉太夫人及
太夫人卒終制起復為翰林待制拜集賢直學士階奉

訓大夫天歷元年文宗即位命公往祀南鎮二年春還
自會稽涉吳中以疾歸夢夜賦詩有云竹樹瀟瀟夾泉
石九轉丹成生羽翼自意為不祥果歿其平昔所友者
若清河元明善東平王士熙四明袁桷巴西鄧文原長
沙文矩悉當世豪傑聲名之士其平昔所著書總若干
卷有所鈐梓悉上送官藏之秘府其外集聽雪齋紀青
山漫吟曰倦遊集曰豫章藁曰上元新錄曰南湖紀行
然歷兵燹未免散軼今所存者惟雲林小藁而已幸先

生為序之予曰爾祖以文學發身仕於勝國超至華顯
入鑾坡禁林之邃名高一代文照千古既壽諸梓以取
入秘府未得以廣其傳可為深惜今爾後人所珍藏者
但有雲林一集豈非存一二於什千也哉歐陽子謂聖
俞詩窮而能工余則謂仲章公詩達而能工然是集國
朝翰林金華景濂宋公已為之序余恨失之斯馨之賢
特屬序於余第余以衰陋之資不腆之辭非有卜商之
文學又安敢序公之詩哉但以斯馨請之固姑綴是語

歸之俟後當有執鉅筆者為之發揮云洪熙元年龍集
乙巳春三月之望南京國子助教三山陳嶢書

欽定四庫全書

雲林集卷一

元 貢奎 撰

雜言

志士常惜日達人寧慕名寥寥宣尼聖長歌愧耦耕六
籍矧已殘紛紜起亡羸守經漢儒者策世何所成聖功
苟云效致澤希阿衡赫赫金仙化奈矜勢方行歸與猷
畝樂豈係辱與榮

璞玉不自售匣鏡翳空塵豈復妍媸鑒內蘊

缺

流

雲有時滅圓魄湛清昊不見荆山韞終為百代珍

秋懷

瑤漢夜澄寂烈烈羣象嚴浮雲翕交互圓光尚微纖
階蟲競鳴聲濕雲度虛檐持志惕自警屏營以深潛
驚飈動幽幌凝香啟方奩栩栩莊生蝶秉志能養恬
雞鳴何孳孳憂心愧如惔

蕤蕤庭前樹皎皎美人姿秋風白露下華葉日以委
玄

蟬抱餘蔭音響一何悲物性固其常代謝詎睽期由知
是貧賤所守寧爾移

坐久閱衆籟息吹予冥虛庭貯靈采孤槐影稜層攬
衣起旋舞愧此膂力勝素養豈不善而以禮法繩立賢
矧聖術私智非所矜念彼東園瓜延蔓亦有憑齊物非
至言維古恒自微

紀夢

癡兒忽在眼夢覺萬里外寄身如浮雲起坐發長慨所

以棄汝來恩義固有賴讀書雲林齋生閱景明晦勤懶
出天性責善係亦大我歸須可期秋江斫鱸鱸

避暑

避暑北山下修簟夾林陰客來澹忘言稍覺清我心酷
暑尚可避酷吏不可禁迹絕畏途轍涼飈散塵襟却嗟
避名者猶恨山未深為言暑與吏縱酷何能侵

敬亭山

名山鎮宣郡古祠崇敬亭傑構靚深巖飛廊引重局涉

彼百仞高始覺萬類形樓殿勢益弘兵衛森幽靈增秩
觀隆典綸音播明廷豐穰走祈報烟燎浮芳馨竹樹蔽
險壑虛欄俯南垞麻姑湖上碧華陽天際青神颿颿然
起新涼濯微醒踈雨暎白石垂虹截蒼冥永言李謝遊
豈惜歲月零悠悠孤雲去渺渺從雙轡招之殊未來莊
思展函經

贈唐立夫

馬昂夫之弟

我交海內友頗識男子奇君家好兄弟高林玉連枝偉

哉清獻公觀此積慶垂難弟客西江從我不暫離危言
動權貴談詩解人頤同朝遇難兄未面心先知文章徹
宸宸鵷行昭羽儀歡然顧寒士慷慨衆迺推嚴冬雪翻
絮飲我堂上卮別來倏幾載江上纔一麾青山謝公宅
髣髴猶當時惠連更清發攬衣往從之緬懷彭城會風
雨情無違孰云今昔殊事往若可追笑我辭薄祿歸耕
類兒癡四十奉慈母晚嗟憂患罹歲月不相代偷生苟
棲遲聖賢有前躅名謗古所隨騰驤亦何意矧迺齒髮

哀多君遠相訪艤舟烟水湄恍惚若初覺既見還驚疑
問舊漸零落審安心稍怡壺觴粗延款真率分所宜酷
暑汗雨浹終朝竟忘疲喜傳二州政戍爪將及期東南
美官况斯文尚堅持側聞賈使君協恭淑民彙公餘愜
幽賞黃鐘和塤箎凌高重懷思輕颿起清漪

天遊亭

涼秋馬肥健山行快閒心斜陽衆峯出豈待窮追尋茲
亭獨崔嵬超然散塵襟瑤漢湛虛碧靈颿蕩幽陰澗漾

連沃野蒼茫俯喬林真游本無馭妙道悟非深麻姑去
何年樓居集華簪棟宇墀高下薜蘿徑蕭森玄蟬解新
蛻嘒嘒高樹吟物理感時遷世轍徒駸駸懷哉學仙術
孤雲度遙岑

答陳華仲

五首

海上三神山上有學仙侶泠泠紫簫聲吹作飛鳳語迴
飏蕩溟海散落成烟雨豈無知音者一振九苞羽持之
獻天庭上以奉明主

白玉蘊奇璞混在沙泥間輝光豈不媚過者誰為顏一
朝匠石工琢之成匪艱五繅藉蒼壁九章縈玄環世人
始知貴仰瞻發長歎

一鶚摩九霄驚鳥空累百結交四海內知己何其窄文
章未易識舉世嘗見惑橫琴待鍾期泣珠愧淵客長雲
去蒼蒼俯仰空嘖嘖

鏤冰為文章點鐵化黃金術成將何施念此工力深知
者自相尚豈復論升沉勗哉保明德幽光隱華林

貧賤交有道富貴多異途所以古君子擇交嚴所趨霜
劍閑寶室烈士發長吁隔世或相慕同居分越吳寥寥
千載間羨彼管鮑徒

夢故人

千里萬里道三年二年別鴻雁去復來我友音書絕夢
中忽一見款語情更切覺來失處所殘缸半明滅相思
各天涯長夜寒慄冽風霜草木變貧賤不易節中心諒
誰知素月當空潔

送年景陽并寄其兄

獻翁魯靈光伯氏清廟珍斯文淑後學醲浸如飲醇前
哲端可踵念此道屈伸恬然山中趣白雲結芳鄰別久
歲年晚渴思欲生塵何時遂歸隱青燈願相親仲兄慷
慨士相逢客青都隔屋重情好詩酒時與俱子方留上
京揚袂青雲衢天祿虛校席冠豸浮薦書才名動觀聽
笑我何闊迂重來遂握手臨風憶翔鳬北風天初寒駢
車戒晨途餞子地千里况客天一隅會遠非贈言情鬱

何由舒引瞻赤城霞逢衣領羣儒橫經振家學舉酒奉
親娛勗哉遂至樂世榮復何如

題董簡卿所藏瀟湘圖

瀟湘在何處展卷心悠然是中有雲飛上與蒼梧連憶
昔弄扁舟載雪清江天湘君招不來明月隨我前微鐘
破征夢落雁棲寒烟回首行萬里攬衣羨孤寒可憐楚
人辭憔悴窮歲年圖畫豈不好此意誰復傳已矣三嘆
嗟臨風叩商絃

和虞德生教授韻

涼雨夜如沐微風激商瀨紛紜窮日力燕息奉冲抱虛
名亦何為顏色倏已老陋彼楚野民則足期售寶山中
豈不樂饑來拾瑤艸聖賢希方策後世謾論討出處寧
有殊所貴在聞道

境靜人跡稀虛心似觀內夜深氣逾清稍覺絕囂憤至
言析精微古誼感勞徠天游本非難道大豈能載熒熒
珠走盤落落駿歷塊推物寧免拘離形庶無礙長風起

冷然期子挾仙珮

夜坐

京國雨初霽虛堂夜氣涼
新月上團團坐久流清光
露葉閃明晦河雲互飛揚
機籟發天秘起弄琴與觴
千里同今夕幽愁結中腸
濕螢低復舉栖鳥亦驚翔
適時物乃貴人生何慨慷

夜久境逾靜居然庭樹秋
氣機發羣動時節無淹留
涼露浴蟾彩浮雲澹河流
微生競如髮彌思志常周
精爽

一以竭榛烟蔽前丘道貴善持養日入當偃休寄言學
仙子文字徒冥搜

謝鄧善之袁伯長二兄兼次韻

炎夏何所適高齋澹忘情窮變士固常坐閱時晦明
蒼永黑潦積雨餘綠陰生酒罇已復空書帙徒充盈
悠然尋尺內睡覺起徐行開門遺篇翰溢耳流詩聲
溫溫鄧子辭至寶道傍橫袁生雲間翮世網亦暫嬰
時還赴清燕我抱一為傾

京城客館

公宇日無事閱書稍怡情浩漫罔窮極靜定悟始明籠
禽動幽響庭草遂微生俯念節物變宴處常思盈寧復
辭勞苦王事駢我行雨餘夕陽酷空雷殷殘聲暄爽條
未定雲執方縱橫訪遇當獲趣及茲煩抱嬰何時故園友
濁酒與同傾

集庶園

宿雨洗炎燠聯車越城關廣躔隘深潦飛棟栖連闌行

經水石勝稍見華竹環陰靜息影迹窈窕紛華丹兢兢
是非責侃侃賓友閑蔬食常苦饑世榮竟何攀學仙本
無術即此超塵寰

抱疴迸囂俗荆扉戶常闕新沐散腰髀縱騎踰通闌列
袂淪雲茗叩琴墮瑤環羣樹藹新綠孤華粲微丹拭目
咸展趣曠心自逾閑東山豈云遠駕言事躋攀焉能踵
重迹擾擾走區寰

長春宮同伯長德生儀之分韻得山字

古道蔭樹色橫槎度溪環上方鬱樓觀崢嶸俯塵寰兩
兩白玉童客來啟重關似非勝者流此日詎可攀攬衣
空中雲柱笏城西山烈風忽晝起薄霧天已慳拂石坐
寒寂垂綆汲清潭悠然時自得一笑開我顏玄鶴亦交
唳乘虛動清飈安得與之化千年却當還

題淵明圖

若士超世流高風凌飛仙倦懷經濟術嗜酒豈自然去
之千歲間才賢孰相先畏途輟皇皇歸歟袖翩翩日暮

孤雲飛黃花澹秋妍坐憐王弘輩矯首南山巔

贈碧溪相士

雨霽秋色淨新涼方可人流溪碧如染照我鬚髮真平生作詩苦羞拂鏡中塵為向無菴說歲晚願為隣

觀梅貽賈元播刑部

結根歲年老遠歷冰雪餘居然異土姓發英遂蕭疎抱貞亦宣銜知音固有殊桃李借顏色強立春風株昭被雨露榮道味仍清腴皎皎物迺忌寧畏緇塵汙晚月忽

弄影清香襲芳裾念茲百年過奚必孤山逋棄置真自
知一言重君吁

同元學士諸公以落月滿屋梁猶疑照顏色之詩
為韻賦贈鄧提舉之官江淞

天寒道路遙歲晚風雨作虛名諒何為矧此懷抱惡子
行既云愜離居愧予索物盛固有時空山正彫落
悠悠故人心皎皎江上月行行道中乖冉冉孤雲隔相
望一何遠相思幾時歇月虧會復盈持以心不滅

江湖起秋風，眯目塵黯曠。
挂席飛雲巔，行子歸意滿。
塞予如病鶴，欲逞翅常短。
悵望不能休，城高暮山遠。

斯文日已弊，何以振靡俗。
維茲東南州，前哲賸膏馥。
儒臺列華要，厥職重攸屬。
育材體菁莪，懷居詎私淑。
莽莽彼忝墟，黯黯亡社屋。
懷哉鶚林音，淳風俟斯復。

念我事遠遊，茲焉屢星霜。
子行雖云先，受秩已還鄉。
玄髮日以改，夢寐侍親傍。
風靡波逝川，欲濟寧無梁。
枉道誠自羞，貧賤士乃常。
緘情睇天末，冥鴻亦驚翔。

停車子踟躕把袂我夷猶念此欲別難况乃交契綢雨
霽白雲飛日斜紅樹浮望極意逾遠愁多身更留豈無
負郭田何苦事遠遊歸來亦從人商歌激高秋

鰲禁肅弘敞璇題映清池砌石轉午陰疎桐靜交枝曳
裾接劒履輝華矚名耆列職諸俊良萃拔五采儀晨饑卻霞
餐翺飛念何之豈無戢翼思矯首鳴聲悲積簡護緬襲

缺詞

俟雕摛羅致詎云晚占情竟奚疑優哉西湖居虞彼北山移
濛濛雲氣深渺渺瀛洲嶠關情重迴首滄波閃紅

照

白雲一觴酒離思滄溟間子行勿復居念我何當還杳
杳飛鴻書瑟瑟清鏡顏璇璣不私貸歲月忽已闌贈之
雲錦章璧書彼蒼玉環何以解塵纓幽泉弄潺潺

湫湫西湖波宛宛漫山色輕颺轉

缺

盖妍藻飾慷

慨少年子仰箭墮飛翼歎然天一涯茲樂豈再得勗哉
重言辭慰我遠相憶

夜坐

皎皎凍雲被燎燎羣星臨高齋永今夕虛櫺閃華陰彼
美勞我思迢遙隔川岑微火漱石鼎驟飆振懸琴維昔
功業彰歲月念已侵凝塵隱旆色堅冰戒車音豈無五
畝園藝耕盡高深曠志虞捐跡名義夙所欽神交倏遊
夢起坐一整襟

伯長南歸余方北行以詩見遺因和以謝

古士今已矣交道日以淪執交萬里路念此古道存離
別忽及期悵結難為言旅雁聲嗷嗷歸燕影翻翻駕言

方舟適挹彼河之源晨風起崇甸維北正我轅志氣豈
不樂白雲慰前騫詎為戚戚懷上累徃哲論七星耿終
夜巨海賓朝暾勿嗟遙相望寧能戀丘園起歌復為舞
願酌臨歧樽

洪璣驛樓

朝雨路絕塵晚晴雲起山樓高亦可愛寄我須臾閒下
瞰百尺淵靈恠蟠清深豈無澤物功汲引常自難崇甸
曠氓俗郵兵衛屢闕永言託遐征羨彼飛鳥還故鄉望

不極杳杳蒼冥間

上京

維北千里遙山嶠極蒼冥車行輻屨折崎嶇倏旬經聽
履事朱闕秉翰直彤庭烈風駭九夏中天橫七星至治
謝藻飾尸居愜深寧旋駕諒有時凭高睇南垌

詠史

伊昔聞漢武英風彌八區拓邊開諍路蹇蹇羣臣趨正
色折平津分符居海隅談諧侍清宴從容保全軀手招

王母來環珮鏗瓊琚寂寂茂陵草千載令人吁

雪晴

今晨持我書燕坐雪照屋閉門謝塵鞅展卷自朗讀衆
說初若攻冥思意纔復旭日上團團清泉渙春綠涓涓
晴欄溜洗眼濺飛瀑豈不事遊觀驅車泥及腹永懷同
袍士歲晚在空谷好風忽東來起玩庭前竹

送夾谷伯敬之單父

燕州連日雨六月寒裝綿閉戶斷車轍修途溢如川朝

晴悅物性槐陰起初蟬衣篝濕餘潤照眼階葵鮮聞君
去儀曹五馬行翩翩緬懷古單父高堂坐鳴絃政理日
以媿寶此千載賢矧此存歲饑夏潦仍相緣嗷嗷東南
州流移踵車船死者相枕藉羸瘠甘棄捐民命懸守令
壅遏誰當憐君懷策世才往哉寄承宣譬彼善牧者鞭
擊非所先戴星亦有人何迺任力專淒涼二子遠故老
應相傳我昔嘗經遊土風尚熙然迴河抱阡陌桑麻綠
浮烟豈無稌稻區草木紛華妍維茲重責任慎彼澆俗

遷會徵太史書家聲振當年

送良史

西域人嘗學于江南除翰林編修今省歸豫章

鬱鬱楚竹實飛鳳以慰饑鳴聲迺鏗和遂息蒼梧枝時
哉一朝遇槩若五采施矯首滄江雲空晴散何之豈不
比翮翔悠悠眷予私驚颿起層波落日增餘悲去去勿
久留赴此遠大期採風詎辭責上寄簡冊垂緘書誰復
悟為子歌別離

亦樂堂

謝身榮名外築屋山水間華藥植前庭翳翳佳木環魚
鳥相泳飛孤雲亦來還陟此興所思百歲遺以安豈無
畝鍾田供此先祀盤當春兆微和耕作匪辭艱修塋起
鱗鱗時雨瀰滄灣鷄豚自蕃息籬有雉笋斑酒熟誰共
斟掩書一酤顏

南劍教授揭從年惠詩就次韻以餞

君詩何所似天飈灑琅玕示我春容篇讀之為清寒於
焉稍相接談經古翻瀾疊疊窮本源非徒涉塵寰力趨

仁義途愧此儒為冠詩者君之餘嘆息鳴鳳翰時哉施威
武德舞瞻羽干豈無往哲言藏之於學官命教責非輕
辭訓嚴誥盤厥服固云遠傾露排忠肝溶溶水如璜樂
彼朝莫翰蠹道今多岐鑒此孟與韓愧無仁言贈別淚
為君彈

壽閻承旨

大道傳孔孟盛治躋虞唐造物重責任間出非才常隆
隆金玉貴采采麟鳳祥莊詞補天袞雨露昭春陽令譽

守嚴介崇居樂清康願為民物壽詎止斯文光

清朝重儒術贊論知自來譬彼陽澤布生物徧九垓豈

無干時士挾策攀崔嵬後生厭藜藿遺老

缺

萊學者

日以踈顏波何由迴願言壽斯道為國培英才

盧溝野亭

出郭野塵絕青山開畫圖迴岡萬井聚梁虹駕川途杳
杳車駕集交臂無寧軀粲此一畝宮而有靜者居花木
明窈深魚鳥樂澄虛濁醪得釀法好客時與俱昔我東

南來萬里馬足瘡解鞍道傍樹塵渴嘗自沽題詩忽在
眼日暮飛雲孤

和袁伯長冬至燕集韻

黃鍾起葭琯玉樹華寶宴清交寡常流鏗辭表時彥盈
盈勸浮蛆裊裊簪綵燕雅服稱儀新嘉蔬列鄉薦香銷
神用舒棋覆心罷戰培花候奇識煮茗遂清咽虛幌雲
度英空簷永落線永言悅書玩亦豈慕盤饌塵踪合渚
萍芳歲惜流箭念此遠道逢令人久懷羨

題雲東軒

城中紛華地借屋得佳處居然俗士駕欲詣不知路門
前柳陰深溪水清可度我行萬里倦頗缺趣有時

忽來坐談笑竟忘去孤雲遂閑適悵望心所寓平生曠
蕩懷落筆題幽素要當居軒冕此理常自悟酒興方未
闌青山任朝暮

題陳氏所藏着色山水圖

獨卧曉慵起夢中千萬山推窗烟雲滿一笑咫尺間嬾

媚美人粧金碧筳鬟素波淨如鏡綠蘋點秋灣美哉
筆墨工貌此意度閒孤禽立圓沙漁舟遠來還我方厭
闌市坐對忘朝餐安得林下扉深居長掩關

雪中

夜寒如卧水朝雪擁我廬開門盈數尺呼童掃前除梅
花費追尋色養何以娛瓊樓起突兀玉樹長扶踈笑瞻
鶴髮垂容光照豐腴獻歲元紀新履此景運舒辭秩久
未歸清白方自居賦性本太素養之况冲虛融融若可

金分四ノ八ノ二
卷一
釋皎皎豈易汚林酒釀成缸烹茶拾薪枯庭雀何饑飛
時聽哺林鳥先時期一稔占祥彌八區會當上太史首
作王春書

題楊玄翁千載心堂

明明一寸心肇自天地始傳之無終窮豈曰千載止念
昔川上人長波歎流駛簡編日以繁烟海浩無已惟茲
道彌高屹若尊嶽峙冥思契前哲焚香燕清几哂彼朝
夕謀振衣為君起

書巢

吾聞太古時構木巢為居聖人作宮室後古漸夸渝達
者會至理淳風復其初闢室方丈間所向無非書典墳
久茫昧汲冢紛恠迂殘經耿星日補緝慚漢儒豈無百
家作充此積架儲浩若棹烟海仰瞻在天樞伊誰以巢
居何當與之俱棲安類倦翮乾蟄同鱗魚朝夕偶在戶
飛鳩鳴屋隅枯枝結樹杪反觀尤裕如物理匪有殊令
人發長吁

秋日陪大學士趙公憇龍山玄真宮

巖巖居庸闕左挾飛仙居蒼茫四山合石經穿盤紆人
家稍相接林木何森敷觚稜生曉烟玄風凌紫虛念彼
羽流集豈與世俗俱溪流轉雲碾餘潤分園蔬鐘磬答
空谷齋供薦芳腴穹碑記宗傳道一教乃殊素飡貴崇
本卒歲事耕鋤漁父在何許空有桃花株坐慚秉文幹
尸祿常曠迂日暮陟曾巔丹霞成長裾遙睇空中雲超
然能卷舒

題城南讀書圖

來我日下居偶見城南畫蕭然松竹間聽此風雨夜黃
塵蔽烏巾青山開白社安得携束書友爾閒靜者

題歐陽氏思亭

鬼鬼墓在郊孤子客遠鄉念昔霜露淒三年廬墓傍忠
節父母全子何能顯揚釜祿不逮養哀情為之傷冥冥
終天訴悄悄歸路長高林蔭枳棘飛雪暫迴翔斯道期
遠大殘經究微茫勗哉重孝思須臾豈能忘

題羣雁圖

羣雁真可愛正與凡禽殊所樂在江海往來能自如漸
陸常以時飛鳴遙相呼旅食寧少饑宿擇沙水隅可人
客西方不寄南來書橫空亦有字浮雲為卷舒渺渺烟
草濶蕭蕭蘆葦疎何當泛扁舟翩然與之俱

登齊山

出郭行五里落日衆山赤中環翠凝巒秀色起千尺風
流杜牧守壯語鐫妙畫我來嚴冬初俛仰一今昔人烟

久變故鬼恠據幽僻披叢得小徑往來遭折屐亂石排
犬牙荒洞泯龍迹空餘岩前碑雨日自淋炙黃花既非
時何以供太白但須歷魯巔一笑天地窄

銅官山

遙遙銅官山逆水去千里山瘦木落水涸石見底棹
此一葉舟觀山復觀水得山可棲身得水可洗耳中有
千歲松根深簇苓美孤鶴巢空枝歲晚知所止愧我驅
塵蹤去去獨未已長歌呼謫仙回首白雲起

虎林玄妙觀

琳宮古鬼鬼獨據山勝絕天光垂帝座照耀金碧色脩
廊接層厓俯目視深澤陰陰木葉暗石削蒼壁列流泉
出嵌空六月灑飛雪平生功名謀洗我肝肺熱同遊得
幽人再拜摩斷碣興亡見唐漢高爽了吳越更擬窮幽
探馳景忽西滅

和胡則大贈別詩

乾坤秋氣清遊子眼界濶雲起青山顛風動白蘋末明

明一寸心光映波底月得稟天自然此中本無物同遊
愧君才季鈔多俊傑昂然六尺軀精彩照玉雪母為功
名拘中路意慘卒不見前者桐剪伐中琴瑟

茶藤架

西園檢春事積雨斷餘紅茶藤壓高架皎皎晚日烘翠
蔓點殘雪清香度微風幽人對之坐瑩然此心同裛裊
不忍去片月來高空宛如萬玉娥素袖舞雲中珠璣露
顆綴翠珮烟光籠愛花不受折枝柔刺盈叢携酒醉其

下慰此良夜終

宿鳳口會九萬兄

扁舟下滄溟日暮浮雲散青山袞袞隨十里行不斷古
屋集人烟艤纜臨絕岬誰知兄弟情邂逅忽相見篙師
輕波瀾呼嘯驚夜半貪程慮涉險欲往還自筭推蓬視
天宇白露下淩亂衆星亦已沒落月破微暗念此局促
身倏然重三歎

過雲川橫山

山迴溪流奔眇目古廬會有百年祠行者多再拜乾
坤秋氣高蕭瑟鳴萬籟青林魑魅號素壁風雨壞獨憐
神明功扶植古木大矧余及凡物朝夜顏色改俯仰亦
有時感慨獨無賴夕雲念羣征舟楫吳楚外

自紫極宮出關謁徐孺子墓

高城練江曲登閣聚遐觀瞻此靈迹殊脩然俯塵寰烟
樹翠偃蹇汀洲雪瀰漫舟檣列林幹野市喧城闌緬懷
吳仙遊逍遙駕飛鸞流光閱千歲倏焉去無還遺世亦

有徒羽衣鑰玄關沸鼎聽雲茗巢松羨風翰簡書抑何
俗生愧半餉閒同懷二三友驅馬復縈盤前郊昔蒙密
落葉地始寬岑崑漢士墳吊酹涕汎瀾勲業豈不崇名
義夙所難驟暄變輕袂稍覺霽景慳遷境勝無窮西日
銜晴巒

登虎丘山

古士雅巾屨具舟約芳遊朝晴出西郭午涼登虎丘松
逕度遙嶺歷此層級修當時吳王劍斨光裂岩幽平甸

眺萬頃閒瞻烟樹稠頗聞山僧賢飛錫下林陬獨遺方
丈空於焉集清流一簞可平生豈惜半日留煮茗試泉
冽焚香延宿篝疎雨催晚歸溪波散浮漚

即事

眺望高城上曠遠散羈愁西郊霧初斂山光翠欲流井
潤延蔬畦樵歌落榛丘林疎見村屋翳翳炊烟浮興來
思偶成工拙何暇求有懷陶元亮千載當與儔

藹藹羣樹林孤雲暮來歸紛紛飛鳥倦斂翮相因依臨

軒方獨坐涼飈吹我衣物理固有常悠然悟其機山中
豈不樂躬耕自無飢百年事未晚何勞歌昨非歸與友
田父一樽聊可揮

斂迹居陋巷况值風雨時朝晴稍悅性驅馬何所之交
朋數斯疏貴達分異宜前路方畏暑把轡獨遲疑何如
且復止委心向書詩揚揚空中蝶眩眩庭下葵芳物足
可玩盛衰無乃隨士生貴有名固窮庶無虧寂寞非已
沒名在亦奚為悠然南山下愛酒人自知

聞張彥清學士田兵部訪郝尚書于西山

春山如美人盈盈弄顏色秋山如烈士磊磊吐胸臆行
樂豈不佳好尚隨所得推窗致爽氣蒼翠浮前劣况復
九月交悵望情何極淵潛研洞曠厓轉迂徑直委葉護
荒苔寒英耿叢棘勝日集羣彥言笑遂幽陟離索何以
寬愁思居然積振衣欲相從塵事勞屏息高歌停雲章
願寄西飛翼

題舜舉秋山圖

溶溶白雲度宛宛清溪流磊磊數峰立鬱鬱羣樹稠何
人結茅屋坐俯林塘幽平生採芝藥豈識人間愁危檣
引微徑落日涵孤洲我昔山中居景物窮冥搜展圖忽
自慰悵望何當游極漢唳賓雁空缺歸舟學道有達
缺忍作終身謀寡知亦將去茲焉暫遲留

思親

我涉江與淮思親日以遠朝行夜忘寐念此情繾綣虛
名亦何為逐末乃舍本駕言偶成興中路悔已晚白雲

起悠悠清泗流宛宛仰慙林間翮日莫倦知返萬里萍
汎波三年馬馳阪賦歸何辭遲相望願强健愉愉手足
情奉侍加飡飯

雲林集卷一

欽定四庫全書

雲林集卷二

元貢奎撰

元日書懷二首

今日復何日人事寧得安蕭蕭馬聲中杖履尤所難豈
無知心者禮法與我寬閉門求聖賢展卷一長歎

我愛陶淵明夢幻視今古濁釀亦何味棄官乃歸去誰
言千金軀終作一坏土人生貴相逢不飲豈足取

謝劉蕪美劉元鼎二兄見訪

我去古人遠展卷乃見之衆說初若殊會歸無二歧陋
巷寡朋傳冥思心始夷高軒二妙來照眼光陸離千金
蘊名價五德呈瑰奇志專發疑難躬行肅形儀勇超君
子途非效俗士知譬之車正轅適然終可期秋雨涼滿
袖孤燈耿深帷仰瞻數仞墻閭奧寧易窺前哲有軌躅
努力當後追况子方盛年愧我老且衰勉焉各崇愛執
手重懷思

雜言十首次徐芳谷韻

盧敖欲求仙若十嘗見一烈風破洪濛事往不可述
蟬蛻猶具形螢飛未離質化者時固然窮搜漫終日

履途或云縱臨淵慎毋怠當知不自損亦豈人有害
美好株塊如玉石無庸慨何如伯成子躬耕隱隆代

古來賢達士託志不在酒文章有公道此外心獨不
穀滿將發機襟動已見肘毋令竭精爽千載誅腐朽

空塵罩寶瑟中夜起一撫停絃復默坐月落星可數
絨

咒羅我前山鬼氣頻沮天風若有助庭樹聲挾雨

瑤臺授寶訣丹砂駐青春茲事豈恠誕愧彼世間人蝸
粘競錐刀蠅營積涓塵已矣竟不悟畢逋逝踈踈

陶潛賦歸來老境日已迫寄家如逆旅欲返南山宅元
載一何愚椒斛藏八百懸知賢達人知幾謝天厄

阮孚着幾屐嵇康揮五絃曠世以為達荒丘起寒烟豈
知悟道者無為修養年盜名速天禍此說何由傳

蓬萊起崔嵬形儀鬱包承上盤凝空雲下結積壑氷升

高危引汲汲清渺懸鉞念彼鴻鵠飛冥栖却矜能

龐公隱鹿門衣冠頗尊偉豈無後來人寂寞知者幾榮
啓何所遺妻子亦多累長歌帶索行誰復踵其履
斷蓬離本根一去不復戀孤雲何當還日莫情迺見舉
世悟者稀求名以流遠嗟我麒麟圖燦燦冠與箭

河上阻風次韻袁伯長

奔河逆牽舟北風忽中阻篙師勇支撐騰躍勢如舞塵
砂晦高旻泥水汙后土電飛起潛蛟樹拔亂驚羽須臾

金匱要略卷二
西日霽雲端散紅縷維此造化工而我獲窺覩故人適
同懷破險出奇語明朝隱張帆萬里端自許

舟泊蔡家店

謁告會通籍旋歸駕輕航偕行夙期踐周覽愁思揚朝
陽光景鮮時雨民物康締服始便體蔬飯聊充腸閱書
破幽睡欹蓬進微涼崗樹翳雲重巢鶴凌風翔黃塵忽
奔蕩青郊竟蒼茫心目先已馳道路阻且長窮變固歸
理晴陰稍乖常念茲永日留哂彼浮生忙煌煌北有斗

君子毋相忘

貫州

扁舟放河流驟暑消雨餘既忻歸計諧矧與佳士俱雲
霧重回首惹籠鬱瑶居微波散碧縠簌蕩明月珠風急
帆滿張獵獵病肢舒亞樹花換葉離巢燕將雛眷彼別
時語不知今何如簡書豈足畏青山念吾廬勿謂道路
遙坐覺山川驅華樽方自持相思少歡娛緘情何以寫
攬情起踟躕

賦得新月

團團故園月微鉤畫雲端孤舟天際來湖波正瀾漫但
念時節流不畏道路難晚樹齊弄色晴飈驟生寒歸鳥
哺高林稚子迎門懽夢中修先至相思強加餐

邳州

古城結危構交達哀招延朱碧遞隱見岡迴勢蜿蜒填
車縱橫遊重屋充華鮮扣門多乞食民饑遠流遷桑柘
重綠藹鬱鬱浮蒼烟念此萬里道我舟亦已旋雲樹列

環岫晴鳬散平川
烜赫驪珠光隨風墮
靈篇神清契高
冥性斂涵靜淵出處古異途世故寧紕纏簡書誠可樂
軒冕非自捐推蓬晚逾缺恍疑助孤騫

袁伯長虞伯生始約同舟南歸既而伯生留京臨
別以雲詩見贈舟中奉和以寄

白雲起西南盤礴中天臺下招笙鶴翔天風為之迴
豈不從龍遊重輝挾崔嵬翔鶴若有歸華采同瓌瓏悠然
忽萬里矧與丹鳳偕鳳棲東海瑤鶴啄北海萊企首思

白雲鳴聲瀝餘哀所嗟變化神微雨朝暮來分陰護丘
壑終復遊九垓藉彼明錦章舒卷慰好懷秋旻氣彌清
短翮亦稍開會合須可期乘高共徘徊

送別劉道夫

春晚益可愛綠陰蔽前郊念子暫時別我心已云勞浮
雲始舒霽倏見疎雨飄暄爽驟變更豈異世俗交微颿
起林杪清池樹光搖沉憂渺餘心哀髮矧漸凋悵焉立
斯須幽禽語嚶嚶

送胡伯恭之官靜安

朝雨徧烟麓溪流漲春篙
桴舟何所適滄江沂迢遙
宰邑江水奧嚴程詎辭勞
政教日以媣夙志方自操
古風豈不還絃歌協清韶
懷我鶴髮親志氣寧昏朝
飛花撲離筵幽居蹇朋交
白雲暮來歸跂望陵陽高

秋日和答友人

積雨晚稍霽返照遠山赤
林闕轉通衢軋軋笋輿入
故人忽相見揖我分半席
論交數年別感事百憂集
酒量

雖不加舉杯暫情適簡書亦可畏於馬重三益

次韻年成甫

我屋青山下江淨餘霞赤三年卧憂患迹絕城府入扁舟乘興來獵獵風滿席豈無知心人邂逅談燕集撫物空自嗟白鷗亦閒適虛名苦勞生於事竟何益

送九萬兄之樂清主簿

宿雲澹朝暎春風散輕寒振衣既行邁慘別情所難王事勞蹇蹇征車戒桓桓孰云枳棘微蔚此五采翰海縣

還靡俗濤江激迴瀾道路豈不遙懷居誠匪安勗哉西
都秩願言繼彈冠

題玩芳亭

日出闌闌喧巷迴靜如村閉門綠陰底粲此五畝園
諶草一何茂雅竹生羣孫危亭俯芳池朋來具壺尊
玩芳正爾得名之豈虛言楚辭我所慕中有至樂存
宛水清可涉往來得閒門繡輿照春晝綵袖從弟昆
矧茲平生交持書亦時論紛華非無地哂彼俗耳聞
作詩頌君美此

道古所敦

寄公瑾憲史

綠陰蔽深院四月微雨寒羸驂借東鄰欲出徒步難簷
楹亦周流於焉足盤桓何苦戀微祿羨彼凌風翰向來
二三友談經舌翻瀾蕭條天一涯出處隨所安念子知
心者重是故時冠

集雲從山

南土氣蒸溽城居厭喧卑官曹稍休暇寄此方駕馳側

逕轉縈曲遙原雜林池煩纓濯微颿前瞻劃舒夷業業
林宇深松桂交樛枝鍾聲出脩廊一飯若有期適意豈
不樂營營竟何為虛談非世具勿遣俗士知素衷慕幽
蹈終焉謝塵羈

宿崇光道院

崇觀邃幽堂於焉息征役淹留倏旬浹亦豈初意得茲
軒更深沉窻敞西園側林梢雨新霽深陰散踈滴閉戶
苔暈生焚香破蒸濕三峰秀眉睫咫尺倦登陟翼翼羽

金匱要略卷二
士流遐踵飛仙迹靈波根玄響風舉脩篁立蹇子慕踪
曠汎志非翫習誅茅憇餘齡荏苒辭世繫

贈送曾提舉

春晏倍思家送客城南去久約欲看花茲晨已飛絮故
人十載遙小酌一時聚攬衣何忍別縱轡且復駐白髮
底須驚青山亦云寓喧颯塵眯目分歧任馳驚歸休不
知疲之子忽相遇恍然平生交介此行者賦扁舟諒明
發江流遠西泝太平重聲教廣以方策布豈惟時措宜

實動里評譽無官不可作適意當默喻郡清才彥稠庭
靜燕雀度鮮鱗鱠如雪甜芼魚笋芋還鄉抱土樂窮古
在行路中年怯離憂而况老懶具竹林枉新書時時慰
思慕

送俞元明之官僊居縣

赤城離東南蒼岩間石扉靈槎截塵界曉日明烟霏古
稱神僊居欲往事已非林樹藏野縣空街行迹稀之子
萬里役黃塵手頻揮辛苦事科舉一笑辭布衣我公得

茲地扁舟愜南歸
訟簡民俗淳
官清吏仍飢
荒庭啗瘦馬
鈎簾燕交飛
健筆凌青雲
江梅素英蜚
性靜恒自安
諺辭速羣譏
士生亦樂樂
矧以友道微
持樽贈遠別
矢心諒無違

情話堂

桑梓彼西郊
綠陰春晚成
綉衣方弭節
於焉息遐征
永言丘隴思
豈曰閭里榮
父老爭饋漿
童稚亦懽迎
蕭然故時宅
蓬蒿環堵生
親戚何綢繆
話言出真情
開書時

問疑抱琴還自橫端居學力專心定理迺明夙負經濟
才王事念有程孰識陶公志但知輕世名歸歟事未晚
千載此同盟

贈楊醫士

賣藥都市久買車上開平病軀偶相依遠別動離情居
庸五十里度闕極脩程烈風九夏寒日落邊馬鳴野鼠
味窮甘初食心稍驚穹廬亦絡繹馬湏時邀迎畏縮恒
自飢勿效迂士行況挾岐黃書所繫良匪輕擾擾征途

問鼎哉崇令名

送史助教代祀西嶽

秩秩西嶽祀皇皇使臣體高堂壽慈母魚致君親喜一
尊遠相餞萬里自茲始駕言六館士追戀情未已賜環
當有時虛席將以俟官柳生夏陰輕舟動流駛長江何
迢遙蹇予亦東逝執手皓為期何能慍知己仰瞻參與
商耿若此心矢

寄吳子彥

憶昔溪上別于茲，倏經年胡為不嗣音？令我心惘然，燕
舟六月旱火雲蒸。晚天飛蝗密如雨，桑麥浮黃烟秉筆事
詞翰，愧非時政先側聞江南雨。官途浸成川，豈無妻子
累萬里，何由前對食不能餐。枕肱重憂煎蒼蠅，何營營厥
類紛牽連。緬懷嘉樹底，披襟弄清泉。雲林有高處，盍賦
歸來篇。

拜醮北觀

祠告簡宸命秉心直，彤宮儀儀紫霞佩。導以白玉童壇

虛斗星明殿邃烟霧融斂福詎躬有所祈民物豐泰時
肅旆常遐哉方士崇陶匏藉橐栳朴素寓至恭並詞栖
寶函芝書護泥封日晏散花遲鐘磬度微風長生果何
致脫身願相從

又

齋罷敞春服踧履步脩廊籠禽動新響雨餘竹風涼道
人房更深壚烟引微香於焉謝塵鞅間來日偏長

送張謙仲南臺御史

仲夏炎氣盛江河沸焦燉層雲張虛傘電光掣金熬
旱魃奮為虐九土民嗷嗷矧茲東南區颶風挾驚潮漂
流孰可禦弊積成瘵凋側聞我勇冠遠策神驄驕水槩
期素守風霜厲嚴操譬若激清冷慰彼方渴消憂私隱
田里吏牘上下膠要當得其情察察窮秋臺金陵古佳
麗地控荆楚遙翠栢集飛鳥蒼鷹擊秋郊臺端咫尺天
明月手可招勗哉重名德山嶽非云高

送閑閑南歸

吳侯南州奇脫身謝儒冠異人授函笈從容步金鑾裡
禮崇嶽祀潔香命馳鞍持此一寸衷耿耿報國丹春雲
碧草動晴雪蒼松寒堂有鶴髮親眼照五采鸞舉觴壽
希齡萊衣珮珊珊茲樂余固同矧茲平生歡贈師何以
言清飆散毫端

次韻感興詩五首

抱瘵寡營累處晦以養明獨有盈尊酒客來相與傾念
茲庭中華秋悴春復榮年運苟未至亦豈居其名

潦降驪淵深潛珠聚羣依鳳栖高岡石草木承餘輝豈
無百尺松託此孤雲飛士貧擇所附節義乃忍違所以
有曠達悵然歸采薇

晨將一卷書坐與古人言念之千載下其神儼今存今
士惜未殊至道有定論勗哉顏與孟異代迺同門

幽人卜林居永日常掩扉澗水鳴孤叢空烟護蒼微別
來不可見戚戚念歲饑何以寫我心朱絃時同揮

嗟嗟古來士傳者今幾存有生不飲酒徒令酹其魂立

德猶復爾况迺功與言歲月無停機川流逝清潏翩翩
魏公子飛蓋遊西園歌韵豈不美慷慨非至恩羨彼榮
啓輩行歌樂忘飡

贈胡雲畊

握手交恨晚忘年意彌真維茲入逾月下帷日相親方
音亦朴野久挹氣清淳寥寥四聖書訓誥日以湮沂源
考亭理微辭極搜論癡兒稍向學師模誘循循掃軌謝
來迹挑鐙契同倫譬彼曲生蓬遠託麻中伸江雨變薄

暄壠梅報先春還鄉固云樂重會復何因含情涕交頤
言訥心愈諄相思願加食尺書寄須頻

過四安

解舟吳溪濱夕日照長林驟暄方自鬱微飈舒我襟高
樹籐英垂壠麥齊桑陰啞啞反哺烏矔矔遊子心豈不
酌永懷念此叢桂吟積疴拋散帙獨坐理鳴琴行行萬
里遙懷哉古投簪

襟言四首

舉世稱伯樂顧馬價倍增價增馬何益夙負千里能饑飽燕山雪渴飲遼海水但令遂真性超逸非所矜

楚固產至寶草木為華滋一朝獻君門借問識者誰居然則其足九死終不移枯榮祇自辱造物真有知

孤桐挾風雨斃此龍闕爭棄置百年後斲琴發清聲昔為溝中斷今作膝上橫寵榮亦既美曷若能全生

鳳饑啄琅玕飛鳴以其時儀羽人罕識寄迹蒼梧枝城臬飽腐鼠自得謂過之貴賤詎不分已矣隨所宜

雨中

驟熱變風雨氣候一日殊
綠樹擁如蓋殘花落無餘
閒居日偏永手把種藝書
幽幽魚鳥適寂寂車馬踈
田父二三輩濁酒時來俱
愁陰每思霽微涼意稍舒
携筇獨延佇層雲起遙墟

送吳子彥北上

憶昔西江上與子俱宦遊
歸來侍慈母萬事它何求
所嗟知己深衷心動離憂
始忻解篆迴又駕北上舟
弱質

罹重罰抱瘵方稍瘳駢車欲遠送畏寒復遲留冥鴻起
天末晴沙戲閒鷗念彼池上鳳戢翼舊同俦悵望感物
理羣飛竟無由側聞二友佳愜此征途脩烟樹紅泛錦
霜螯碧森矛客行亦云樂人生若為謀癡兒諒追從矧
以斯道侔為言崇問學毋令墮凡流

送史高士謁吳閑閑

春水武昌船帆飛敬亭雨孤城厭喧囂聽此檣燕語揮
手謝時人開胸散煩暑煌煌闕下書曳曳雲間侶真人

紫霞佩執簡授璇宇攬衣欲從之神交諒傾許霽雨沐
霄容風微鵠初舉遊心愜高明脫屣邁行旅懷哉會何
時酌彼盈尊醕

陽墅次家兄韵

層巘雲暗樹芳池水明花幽宮引神隧曠澤沾皇家承
祭嚴秉秩受膳樂生譁于于冠佩集占祥爛星霞側耳
聽笙簧拍手和琵琶撫躬獨兢竦况復寒序加報德期
自揚遙程戒秋槎

真州

我病久不飲持螯唯酒宜開樽試小酌陶然發顏衰蓬
窗如展畫坐愛羣山奇白鷗亦紛迎斜陽蕩清漪笑我
歸六年偶出非自斯健帆各爭先把棹豈得追憶昨雲
林軒睡足忘晨炊故人忽相見慰問無盡時

度呂梁洪

朝發下邳山黃流沂迢迢呂梁開險關懸河傾奔號南
通廣越疆琛貢來千艘連檣駐其下祈賽聲啁嘈罔環

岸勢側廟奠巖陰高橫灘絕東注亂石不可篙嶙峋布
戈戟屈曲蟠虬蛟湍飛稍旁激盤渦散驚濤脩纜危一
綫千鈞泛鴻毛凌虛獨凝睇屹若登雲霄寒雲暗腥蟄
落日搖金鰲我老才氣薄搜吟愧前豪神京望何極輕
颿競羣飄

沙河

沙河冬欲涸流淺日以急膠舟不可行念此勞苦劇巨
鯢魚貫尾小艇纔轉折褰裳力推挽進寸還退尺呼嘯

畚林谷蕩摩激沙石前瞻究泗源高堰限通塞啓牒暴
漂浮絕岬駭平濫篙檣起紛拏跳躍如奮敵安流心稍
舒十里慰行役舟人忽相告上牒晚仍隔官程急方貢
陸輦空委積永念平水功豈遂一朝適壯遊俟時來欲
速非我力郊連秋草黃日閃霜樹赤孤村隱溪曲聊以
供散策白雲山蹉我矯首三嘆息

河流水

十月寒氣盛長河流水漸征艍泝浩浩鉤曲苦逶遲滉

漾圭角露稍沍還參差恍疑戈戟森出沒相傾歎或員
如墮礮或利如鈎鋌須臾驟風激瓊瑤積山危檣櫂一
衝擊糜爛不可支窮陰生極底迺見造化奇履霜固知
堅物序矧及期行役何未已君子宜慎思豈無冠蓋華揮霍遵
大達千鈞載卓轂絡繹駟馬馳覆前罔戒險隕身悔何
追我昔居南州感此日未窺揭來二十年戰兢常自持
終當掛高帆春洲揚綠漪

題呂氏獨樂堂

嵯峨虎丘山大邦控吳門遼海瀟東注五湖會其源古
稱人物區衣冠實維垣版圖上明庭民齒日以蕃賦輸
發大舶率土孰敢援巨室溢華侈莊達競超奔先朝蔚
舊德清波照華軒儀儀八表翁繹繹五畝園喬木一何
茂敷陰蔽蘭蓀科篆隱壘洗錯陳賤璵璠豈無時好新
古道誠所敦荒臺啼栖烏日暮烟雨昏何時東南遊登
堂引芳樽

陳氏思蘭亭

儼儼春服成浮雲澹微陰行隨越山曲脩篁映疎林溪
湍駭遊魚岩花觸飛禽物變理乃常於焉樂幽尋悠然
斯亭上契彼往哲心豈不感陳迹志鬱匪所任猗蘭有
時作亦以絃吾琴武夷參其前佇立企遙岑

讀馬伯庸學士止酒詩

今晨不可出大風吹我帷陋巷泥沮洳空墻雨淋漓斫
朱課兒書冥思解羣疑敲門童子來袖有止酒詩讀之
至再三擊節嘉且悲若飲此玄酒揖讓陶唐時我我古

冠裳執彼璋與圭短褐纔掩缺藜藿空忘飢風雅久已

哀作者微君誰嗟我重景仰老大將何為

送魯威元帥

執手江上別解舟且復留我歌出中懷去子良寡儔豈
無隨世交笑言日以酌空雲起冉冉川波逝悠悠孰云
魯中叟遭時亦周流窮達何所殊念彼終身謀跂望各
萬里俛焉踵前脩日落山未暝驚鴻唳孤洲緘情耿明
月相思無時休

題勉菴

出門履脩途所志在萬里力行無它歧聖賢同一軌藏
息慙斯菴亦豈能自己進脩踵成功孔孟誠可企智者
越其恒愚者昧於理念子獨皇皇求道惟善止所以名
菴義警茲勉焉爾

次韵王敬仲秋蘭詩

秋風吹猗蘭慰我遠相見含香不忍發美目迴笑倩雲
葉自扶踈翠袖時掩面淒涼楚江上紉佩清照絢操節

豈不高亂此蕭艾賤撫絃激清商三歎風雅變

題錢舜舉山水圖

春山如美人粉黛艷粧飾况此圖畫間展卷若曾識林
居傑重構夢寐追往昔列岸泛晴溪落日粲金碧錢生
巧著色棄世有遺迹吾能辯真贋勉哉子珍襲

贈黃少游遊金陵并東牟成甫

危城壓癡雲薄晝陰未舒稍覺風陣嚴急霰為先驅空
齋四壁靜蟄若書蝨魚敲門揖貧士骨立垂鶉裾淒涼

嗜詩苦寂寞涵道腴告別微贈言擔簦走東吳羣山照
晴雪突兀天一隅江流起洶湧翻倒馮夷居設險歷今
古注深納清汙六朝事已往斜陽插浮屠追覽境彌曠
高情落飛鳧文章闕氣運窮達匪異途扁舟泛宮錦棹
彼明月孤鍾聲出定林暮色來烟蕪立言豈不傳驚狐
竄榛墟維茲聲教崇人物何代無堅忍勿浪語抱才應
時須寒飢足自守慎逐權門趨牟子我畏友為貧仕非
迂

正月立春後雨中作

春霽久益佳暴暄欲解衣驚飆起終夕凌晨雨霏霏連
陰竟彌結重裘怯寒威真化妙推遷氣候互睽違憶昨
冬令嚴蟄雷啓先機艱粒期歲登孰將測玄微虛檐下
喧雀庭柳綴瑤璣事簡官遭還日晏捲重扉絨情思晤
語怡悵故人歸

次前韵酬張剛甫熊雪嶠西雨三君子

戚戚念行路遑遑攬征衣歲月何冉冉雨雪亦霏霏維

辰春陽布胡為行冬威抱道以節宣大化豈乖違嗟彼
能言者興怨發羣機疊疊張子辭理趣析情微相以二
熊學咳唾落珠璣英英銜袖來日莫扣烟扉駕言予和
汝遊雲翕旋歸

贈松澗相士

青松出深澗手斲松下苓昂然傲冰雪哂彼蒲柳零坐
閱千歲久雙眸炯如星念此徇名者飄風聚流萍相期
非世尚贈言子須聽

贈李二生

我昔事遠遊河嶽窮所見歸來十年久塵壁常獨面靜
躁豈自殊俛仰聊爾宴英英二生來抱負達時變謂將
萬里行逍遙九州遍淑身貴蘊學內美果何眩方今用
儒術中外布才彥會合當有時禰生奚待薦緬維古廬
陵人物素由擅况茲廣心目遠大脫卑厭坐聳聲價高
頓思璫璣賤江空歲搖落黃花發寒艷布袍白稜層日
莫光彩絢李郎予所愛書請以為餞臨歧重躊躇且用

慰深春


七月五日旦坐

盥擲坐虛堂前扉常晏開簡書脫吏責世俗良寡諧
濯木招鳴禽雨苔潤浮階展書朗然讀孤枕孰與偕
衆說初若攻靜悟意稍迴秋暑日以退微風時自來
辭秩忻有期強顏復徘徊西山懋余思白雲起崔嵬

訪渭口葛秀才因題其壁

山盡江勢急江迴護平林中有隱者居樹木敷清陰推

窻萬里適快我三年心
摘蔬薦濁酒拂石題新吟
醉來縱言咲起坐
臨淵深魚鳥亦遂性
向人自升沉
斜陽忽滿地
引杖窮幽尋
主人樂未足
明朝期抱琴



雲林集卷二

欽定四庫全書

集部

雲林集卷

三

評校官中書_臣李 彤

侍讀_臣孫球覆勘

總校官編修_臣王燕緒

校對官編修_臣吳壽昌

謄錄監生_臣周 紛

欽定四庫全書

雲林集卷三

漢劍歌

爲吳閭閭作

元貢奎撰

古劍薙薙一泓水高堂脫鞘神光起何年失勢竟飛來
風雨靈雌泣淵底自從掌握歸仙人勾連鐵鎖羈烟塵
山石裂開鳴碧玉土華蝕盡浮蒼鱗天官下勅百靈守
呼吸雲雷任駈走或云其來由漢始留侯佩從赤松子

金匱要略卷三
千載相傳有定名造物忌令書大史君不見千將莫邪
離復合氣衝牛斗森滅沒長鯨掉尾滄海濶

題劉氏搏虎圖

北風吹沙塞草萋沙河道上行人稀驅車出門赴古戍
牽妻背子情依違日斜村遠倦欲宿霜露滿地沾征衣
車前忽驚猛虎攫目光射殺寒無威妻奔掣尾子挾刃
一時性命爭毫微起來魂魄俱已喪虎雖可搏人難歸
皇天茫茫九土厚悲號洒淚凝寒霏當時苛政猛於此

大夫束手堪嘲譏新圖已成誰立傳千年婦節生光輝
九月二十七日龍溪寄王敬叔

長沙溟漠沙如雪愛君送我同步屨扁舟蕩漾滄浪濶
別君令我腸寸折西風無情吹我遠回首看君岸斜轉
孤雲落日去悠悠楓葉蘆花情惓惓人間岐路幾時休
江行五日更涉險九華岸高插蒼壁陵陽敬亭森屹立
謫仙去後豈無人莫令彼此無消息天邊有鴈須寄詩
慰我思君無已時

贈送蒙古字周教授

周宣石鼓久剥落浮雲變化字迹訛八分小篆亦已廢紛紛
行草何其多洪惟盛世自作古制書勒石傳不磨知君達時
尚所學落筆星斗光森羅蒙恩千里領教職養育多士培
菁莪諧音正譯妙簡絕窮究根本芟繁柯牙籤玉軸點畫
整照耀後世推名科愧予鄙俚事章句儒冠多誤將如何
寄示師文妣

川明山秀草花馥氣連鬱儀迴地軸晴嵐宿藹屯氤氲

石根飛泉迸寒玉此中縹緲仙人居樓觀金碧繞翠竹
我來曾住纔七日迴首人間白雲速飄搖金衣鶴雙飛
白玉童吹紫鸞曲天聲忽遠柰別何青山送人秋思多
作詩寄女仍自歌梅花零落雪吹盡願拾瑤草山之阿

寒食掃松即事

東風微微吹雨晴春山草暖雉飛鳴時哉物性各有適
人生悲樂難為情客行十步九迴首寒食道旁多哭聲
哭聲多淚成河河不絕淚欲竭往年携手原上頭今年

醉酒原上丘相逢須識夢中夢有聲莫帶愁中愁

雙溪泛舟

扁舟一葉浮溪水溪風颯然吹浪起坐看兩岸疾如馳
轉帆瞬息行十里溪上山光翠欲滴倒影入溪溪水碧
山中曾有謫仙居千古詩聲破幽寂艤舟登岸快追游
詩料冥搜山鬼泣山鬼泣山雲飛薄暮細雨寒霏霏謫
仙渺邈呼不得但見獨鶴空中歸

送鄺肖梅高士歸三茅山

人間六月火雲熱川魚深逝飛鳥絕坐念君歸不可留
明日沙頭當送別詩人磊落唾成珠酒酣惆悵歌擊節
南湖鼓棹時乘風秀野披襟夜延月從今此樂誰復同
回首故人須共說落木蕭蕭鴻鴈征我將携研遊東越
相思應許夢魂飛萬里茅山蒼翠色

和潘伯潤憶西湖行

蘇公築堤繞一湖富貴滿眼人間無遊郎三三復五五
細草軟沙供步武樓船錯襍絃管鳴朝雲欲歸凝暮雨

我來感慨思前人
逋梅零落詩猶新
山頭有泉清可掬
當時歐翁曾滌塵
樂天幾度狂醉歌
惜君此樂成蹉跎
小舟載月獨遺恨
對酒將奈離愁何

將過池陽留別諸叔兄弟諸友人二首

拍手唱歌莫放狂
舉觴飲酒莫令醉
歌聲出口難為情
酒味入腸化為淚
男兒書劍從此始
歲晚烟江片帆起
相如題柱過長安
靖節辭官歸栗里
人生窮達固有時
我輩行藏得其理
沙頭執別意如何
莫對酒莫聽歌我

折梅花君折柳明日天涯愧奔走世路茫茫重回首
有耳不聽陽關詞有口不飲長沙酒丈夫肯作兒女情
對酒悲歌惜分手天荒地久歲云莫飛霜急霰勢欲走
丘壑奔摧山月墮鯨鯢翻波江水破江水萬里從天來
長風日夜千帆過皇英二女今遼絕太白千年古離別
往者不可追浮生何足悲君不見延平風雷起一夕神
劍會合當有時

歲晚寫呈大人

逆風危舟駕一葉青山紛紛飄白雪怒鯨觸泥飛鳥絕
正是江湖苦寒月昨夜夢魂還到家繞門楊柳蒼烟遮
覺來欲歸道路賒封書寄遠憶此時故園花木迴春姿
堂前雙親袖梨栗調笑吾兒讀杜詩

居庸關

居庸關高五十里壁立兩崖雄對峙迴峯作勢遮欲斷
百曲盤旋如磨螳陰風白晝吹颼颼亂石當溪泉嚙齒
道狹才通車一兩貫尾鉤連行不止我從北來識此險

巫峽鑿天差可擬，但願平生足游覽。
何用藏書岩穴裏，馬鳴關度日未斜。
黃鵠遠趣征雲起，安得有酒令我歌。
如城之愁今已矣。

鵬窩

鵬窩道間少井泉，得泉一勺寧論錢。
黃塵萬斛推不去，安得水雪真我前。
夜聞官夫哀欲泣，驅車飲馬行方急。
西峯月下轆轤鳴，孤綆倒懸三百尺。
君不見古來法八家，一井為鄉田耕田鑿井八家樂。
祇今此俗何由傳。

題山水圖

崖傾水涸石見底石上古樹蟠蒼虬風雲慘澹起白日
發卷令我窮冥搜樹旁衣冠二三子粉墨脫畧神光浮
垂竿散策百不憂安得一咲從之遊

貽郭安道學士

人生四十未為老曉鏡忽驚霜髮生辛勤日夜校經史
忍逐草木同枯榮竭來遠道計已左仁義豈與時相并
逡巡寮幕及兩考枯壁坐笑涎蝸行柳城姚公天上客

海內文章今第一稱君筆力扛九鼎譏我別來曾不識
禁柳鶯聲啼蚤春扁舟萬里北歸人白雲悠揚繞親舍
傲晚任遭官長罵相逢又跨驄馬行城西野色春如畫
只今去住復何如斯文珍重嚴所趨倘云孺子可教耳
老去已甘書蠹魚

袁伯長晚訪

大風吹塵波浪起日出行人已如螳閉門病目倦觀書
銷盡爐烟還隱几君來把筆愛題詩風定西窗日暮時

多君此意慎勿語世路紛紛何足數

贈任丹碧鍊師

大雲壓峰斜日明下照百尺清溪橫丹葩碧樹光炯爍
妙筆可作詩無聲買田築屋者誰子江海欲歸吾老矣
袖中豈無千世書當年曾說黃冠師

送郭教授歸鎮江

長江日夜東南來千岩萬壑雲屏開樓船挾榜行若飛
白晝擊鼓轟晴雷屹然中流浮兩峯颶風撞瀾勢欲迴

珠宮貝闕掩靈恠，滉漾百尺瓊瑤推扶桑之西接巨島。
日月出沒荒城隈，英雄遺迹尚可識。人物往往鍾奇才，
嗟我黃鶴起烟霧。杜鵑花落蒼莓苔，當時我馬曾駐息。
浩歌散策為衰徊，霜髯古色猶在眼。恍若薄夢墮飛埃，
六年買屋住京雒。鳳毛忽來光璨璫，論交問舊喜復嘆。
詩酒解后常開懷，如何掉頭不肯住。笑張短席懸歸桅，
故山蚤晚我亦往。莫遣猿鶴相驚猜。

贈鄭醫士

之子遠賦東南歸杏林春入紅錦機平生種德懷不忍
况見民瘼連年饑江國數州尤旱槁骨肉流離不相保
探丸起死誠有之我願從子為良醫

題楓林牧馬圖

春莎碧草如雲起廝官牧馬垂楊底趙侯落筆有天機
神光咫尺藏千里渥洼龍媒空復奇至性却受人間羈
嗚呼伯樂亦已往淒涼自足傳真賞

玉田

仙人種玉玉作田太和薰然為煖烟上敷華榦茂下培
根株連蟾蜍之昇畢逋入露滴霜凝耿空碧九神司閭
夜不扃為君一咲超無形

秋月歌贈潘生

秋月照我如故人虛堂夜深眠復起浮雲東飛河漢傾
太白煌煌斗西指庭前老樹百尺強露濕驚蟬鳴未已
此時我獨據胡床安得兩臂生翼同翱翔文章萬古光
燄在黃河下照太華蒼人生離合豈有常感此三五之

圓光吾聞蓬萊樓居真可住弱水不受人間航便須折
取廣寒桂玉兔有藥浮天香仰天大笑月欲墮驚颿獵
獵吹衣裳

贈倪生

倪生別我去江東嗟我出門何所從我今白首垂四十
愛君秀眉綠髮凝青瞳眉羅星斗筆掃虹口如懸河寧
有窮

贈張娃

張家女兒八歲餘手把椽筆誇能書翠眉玉貌畫不如
一朝獻藝承明廬風雲會合冠佩集當面濡毫翻墨汁
弱身窈窕纔過郗步腕迴旋萬鈞力怒鯨橫海枯樹立
震空忽墮顛崖石功成直與造化俱歛見聲名起京邑
紫裘蒙茸年少兒寶刀瓊帶羊角觿平生一字不到眼
對此悄然顏色赧君不見蔡文姬班婕妤風流文采絕
代無吁嗟陶家五男子總令紙筆為荒蕪

佳人日莫倚欄干風卷羅衣獨奈寒玉光粉暈酣欲濕

雙眸射遠光的爍碧雲蟬髻襪生塵樓底清波解寫真
迴頭一咲向誰語腸斷扁舟別浦人

送朱伯亨

朱侯胸中蘊和氣坐來滿席春風生一官遠在萬山底
閉門松竹聞書聲故家文采自夏異斷溝起復淹長鯨
雨涼江滿送歸棹極目莫雲無盡情

題九歌圖

九疑山高湘水冥玄雲慘澹風冷冷忠言去國今已矣

悲憤空復遺騷經巫歌覲舞習楚俗亦有老桂浮微馨
白龜赤豹駢朱軒樓殿髣髴栖幽靈寓情託寫豈真見
龍眠落筆無遁形淒涼展玩重懷古尺素自足超丹青
歌之招之九復九嗚呼衆醉誰其醒

送徐教授赴欽州

白髮青衫賦壯遊江河衮衮汴南州梅花十月開晴雪
官舍無羶憐坐客莫向尊前思惘然紫螺玉鱠不論錢
笑渠銅柱嚴西極會使民風樂化絃

簡杜希聖

鳴機製素冰雪輝遠寄遊子寒無衣寧令凍死衣不足
要寫陰崖看枯木平生磊落澆花翁安得斗酒澆爾胸
他年有畫復有酒白眼坐傲南征鴻

無題

空房獨卧風夜號孤燈垂燼光影搖舊語已逐香塵消
玉琴瑤珥應自玩巧計却愛蛛絲嬌

張侯禱雨行

城中米貴官作市城外麥禾枯欲死井泉脉斷塵蔽人
旱魃為妖竟如此張侯夜飛赤玉符鞭蛟出淵行太虛
靈颿風轉馳電轂奔騰白浪跳玄珠六合一雲同海岳
昨日憂悲今日樂功歸張侯何可言勺水端合思其源
君不見為雲為雨翻覆手張侯之言我何有

賣雞行

街頭小奴行賣雞先生買雞薦晨炊一時口腹豈累爾
藜藿亦足充吾饑放令雌雄馴飲啄刷翎摩距光烟爍

好生惡死理迺常物性人情共悲樂君不見尸鄉翁庭
前養雞常十餘呼之一一有名字滿樹高下如栖鳥不
似嵇康被殺戮人間虛名何所沽

呂梁洪

呂梁二洪何年開水聲十里聞奔雷斷崖白沙如列壁
亂石忽起生莓苔下有蛟龍潛遁波浪吼上有神鬼呵
護風雲哀危篙撐折纜進寸纜力稍解船頭迴吳江蜀
道未足畏對此心膽為之摧云是禹功疏鑿通地利分

決河水東南來唐人削險遺故迹一時英雄安在哉我
欲鐫詩記其事西山月落空徘徊

贈胡天牖道人

道人久向山中去紫髯蕭蕭目如炬有時隨步出山來
至莫還歸伴雲住自云山中古兩杉至今猶是晉時樹
翠幹參天烟霧橫玄根抱石龍蛇踞作棟誰憐間世才
尋詩且索驚人句未緣俛仰行百匝空費經營意千緒
致身得地亦偶然物性人情隨所寓長生况迺道人訣

朱顏愧我何由駐
嗚呼兩株豈缺異歲寒自覺真烈具
為令山中勿剪伐
一笑時來會遭遇

彥清贈疇齋復古殿端研率同賦

端溪溪深石如玉
刀割瓜膚凝霧縠
巧工製作宛天然
流潤含輝雙眼綠
春風復古清晝間
玄雲落手生微瀾
霜臺雪楮真四絕
到今零落留人間
張侯得研不辭費
祖孫相傳方永世
平生交情重金石
持贈疇齋可無意
當時袖拂墨池龍
薄夢已逐繁塵空
紫真授訣纔足稱

俗書滿眼將無同
絳歛臨洮亦可數
魏臺遺瓦元非古
升堂許我同啓匣
萬里欣逢成盛觀
掬水淨滌浮微馨
朱文刻篆昭日星
題詩且復贊風致
為公傳家當勒銘

高侯畫桑落洲望廬山

楚江浩浩山礚礚
澹然粉墨凝冰綃
直峯橫嶺藏曲折
筆力巧處疑鐫雕
高堂淨如拭坐覺
風蕭騷莫雲春樹
隱復見人家半落
滄洲遙中有隱者
居平生不受東林
招日夜千帆萬柁
過未已誰肯拂袖
同寂寥我愛高侯

得天趣所見歷歷窮秋毫米家父子稱好手率意尚復
遭譏嘲靈機直恐神鬼設變態巨測魚龍驕玉峽飛孤
泉香爐障層霄自憐失脚行萬里微官羈繫何由逃焚
香沽酒靜相對長日令人愁恨消

袁伯長虞伯生約重賦次其韵

長江西來生遠洲極目凝作人間秋奇峯列笋拔地起
殢嵐積翠凌空浮當時懷抱真快事笑撥短棹真鳬鷗
乘清弄影歌窈窕洗淨萬斛黃塵愁風濤擊岸石欲裂

日月出海雲還收別來閒身墮羈束撫手嘆惜年光流
高侯胸中蟠景槩落筆肯為仙翁留神功超出八極表
下視海岳如浮漚至人不遣魂作夢咫尺已足窮追搜
我愛題詩招靖節况有二子鳴相酬便當開罇醉其下
髣髴領客為鰲頭蒼烟歷歷辨廬屋丹樹煜煜明林丘
安得高侯數相見添寫一葉南歸舟

題江南林石圖

青山栖雲泉漱石春風白道無人識
楚楚衣冠仙者癯

偶來結屋林下居門前桃花開自落掃窗焚香惟讀書
勝景忽傳畫圖裏晚日殢嵐江萬里諸公有句寄隱淪
政恐名成為累耳

謝李息齋惠墨竹

湖州墨竹蘇州詩李侯二美能兼之長安城中忽到眼
坐卧六月江南時幽人江南結林屋紫碧森森萬竿玉
清風激昂此君語六月寒生不知暑只今見畫思故鄉
博山日永凝清香人生萬事真適意相對悠然希坐忘

牽舟行

河水汙汙流不已
汙流牽船魚貫尾
怒風捲地漲黃塵
白日茫迷霧雲起
前船纜影百丈微
號呼併力行如飛
後船纜斷勢一失
汗身滿足不相及
須臾十里迴天風
舉檣撒柁懸高蓬
誰知日莫泊處所
成功却與前船同
篙師接語告勞苦
僕從亦復譏途窮
持樽傲坐且引醉
悲喜豈足關吾躬
君不見何獨人生
行與止請君萬事
推此理

度閘行

新河十里分三閘，東水奔河勢狹萬里昂。昂擁不前
我愁度閘如度峽，下閘已開上閘閉。牽舟稍前後留滯，
兩髯咆哮氣敵虎。擊鼓鳴鑼竟何計，低迴却坐同嘆嗟。
咫尺攀躋未能至，憶昔峽江南賦歸。手招五老風生衣，
掛帆一日走千里。錦鯨拔尾開烟霏，爾來閒身落羈縻。
安得化作孤鴻飛，人生百年復何有。羨殺津頭老漁叟，
野祠日暮烏鳥啄得魚。唯知換封酒，故山花木春事深。

回首漂零不知久明朝度聞舟已東歸來歸來乎山中
高陽舊徒吾亦從

除日登大巖山

大巖顒顒昂衆峯長年秀色摩蒼穹中峯獨高勢最
雄支牽脉貫相附庸朝賓大明滄海東烟岫勃鬱凝青紅
懸崖萬仞寒潭空下有晴雪生喬松形勞膽怯望莫窮
但覺一氣浮洪濛松摧雪凍藏蟄龍峯顒鎮以龍王宮擁
潭出雲如白虫妖魅却走年穰豐南村北崦篁樹萊喧

招巫覡過鼓鍾苔荒恠石低復崇嵌空欲墮疑神功直
者覆釜橫列壙森布兵戟羅羣童盤迴絕頂路杳通扳
藤舉膝撐心胸嗟予北遊覽岱宗大行西來連華崧浮
生萬里隨飛蓬夢寐豈與當時同虎行草偃吹烈風苦
寒側翅號冥鴻麻姑敬亭知幾重李謝空復遺塵蹤悲
來狂呼赤鯁公五湖烟波駕孤蓬

題六鶴圖

綉衣昂藏霄漢明手輝白筆秋霜橫公庭吏散事清雅

坐看尺素令我評江頭日出雙檜碧檜旁恠石何崢嶸
仙人已去遺六鶴粉墨脫落臺端精中有一鶴飛直驚
兩兩却顧如忘情或鳴或啄臨流清刷翎獨立足偶擎
靈龜三四方曝晴河華澗草亦向榮當其下筆豈偶爾
各盡意態猶天成今人不作古人遠寶之真足踰璵璠
卷舒終日忍釋手勃勃雲氣來蓬瀛

寄廣東阿魯威元帥

憶昔皇都初識面紫泥新出明光殿錦袍玉色照壺冰

秋蓮燦爛腰間劍鳳麟自是瑞世珍少年功名方逼人
眼前局促亦謾耳萬里南飛丈夫志瘴烟塵霧蛟鰐橫
清颿颿爽開雲氣伏波投老為將軍勒功銅柱何足云
君才真足萬人敵九重側席思賢急滄江早晚下樓船
持杯遠待江水邊願君歸朝報明主四海蒼生渴霖雨

贈李生

字乃賈參政
一齋之客也

長沙之門天下客坐上高談飛玉屑風流往事幾經年
江海相逢意惘然李生當時最相知低頭馬隊教羣兒

門前車馬常雲集伊吾日夜何曾識只今流落竟無成一舸西風載月明夢中猶憶燕山雪獨擁布衾寒似鐵塵沙漲天白晝昏坐令健士無顏色嗚呼歸來忍饑亦自娛豈無牆頭濁醪架上書遭時得名果何如

題楊士允雅志堂

楊君好古名久揚作堂志雅珍所藏先朝功業竹帛繁故家翰墨芝芸香一時擅取天下好百年翁李遙相望林巒水石鬱鬱動雲氣鼎彝章畫郁郁浮重光子孫繼

美不易得玉櫝牙籤頻拂拭家傳手澤千金直人生適
意豈玩物君不見王家寶繪堂奇書異玩信匪常又不
見歐家集古錄斷碑缺字亦尋蓄至今博雅人共傳何
如楊家奕世君更賢江海蕭條二家後美君斯堂耀華
胄

贈楊生

生能琢研

余聞江東之山出新安千峯萬嶺龍屈蟠黃山崔嵬九
華對雄雌時作風雨會中藏龍尾氣清淑山骨稜層石

如玉六丁呵護雲氣漫不知何年鑿深谷南唐綠研膚
起鱗手摩潤澤疑新浴羅紋刷絲名漸殊谷深水淺真
難復舊石既無新石出貴介視之輕瓦礫楊生磨琢獨
非常手持一二來豫章百金酬價猶自惜故家云有千
歲藏或聞山崩泉脉湧翻倒當時遺石動至今散落樵
牧家敲火磨刀隨日用衝煙踏雨忍驚逢席裏羶包不
辭重我嗟拙書好蓄收松烟禿兔非其儔嗚呼人生抱才坎壈
勿輕許時來相遭亦如此

贈竹菴

道人種竹竹為菴一咲相逢楚水南
爐烟曾解麻衣畫心法政須風鑑叅
我欲辭官應亦許清風激烈此君語
人間何處渭川秋五湖烟浪載扁舟

題石潭贈教授葛

勾漏神仙騎鶴去石潭清激山深處
嗟我樓觀拂雲烟自非仙迹何由住
城中車馬困塵埃畫圖令我心眼開
遠山微茫近山峙咫尺盤迴藏百里
斜陽倒影霜樹殢

疑是丹砂沉水底耕田鑿井何所求
秋風酒熟客可留
勉哉同姓勿浪出神仙本是賢達流

題商侯畫山水圖

秦鞏諸山天下美相君愛山心獨喜
商侯落筆圖畫裏
盤迴咫尺藏千里遠山天際抹脩眉
近山淡黛連雲起
下有百尺清溪水石闌木盾懸崖底
時見行人去如螳
危橋吹斷橫沙尾村落林園接遐邇
雲中世家重釋流
東剎凌虛構華侈搥鍾擊鼓兩岩間
西剎輝煌賀蘭氏

商周遺俗亦在耳豈無當時隱君子我欲追遊重雙趾
却愛孤舟岸旁艤商侯商侯巧能擬安得從之慰我思
呼酒盡掃溪藤紙

楊義方參政示舊題王隆山詩因次韻

玉隆絕景藏山幽使君憶昔窮追遊怒江盤旋落彭蠡
林岩六月人間秋上登高壇星斗逼下瞰深澤龍蛇愁
濕衣雲氣翠欲滴貝闕迤邐開瓊樓曲閣文甃護魯級
老樹欹側蟠蒼虬斜陽萬里豫章郭但覺漠漠塵烟浮

晉朝仙人去已遠紛紛遺迹空復求玉華硃忝穿霧牖
霞裾踰蹊棲羽流石函藥臼事恍惚歲以畢痛祈神休
當時使君重懷憫民望戢戢如魚頭秉躬默念颯靈會
坐令飛潛息喧啾去之翕忽十七載鵲辭堅珉思我侯
藥堦晝永試朗讀好風擊節涼颼颼余生愛詩久成癖
再拜銜袖歸珍收驪珠眩眼喜色動脫畧凡卑邀瀛洲
詠陶情性有至理搜抉造化無遺謀何當杖屨復隨逐
簡書終日慙淹留散花鐘聲渺笙鶴松風素浪翻茶甌

慰時歛見功斂散百年神物騰山湫政須霖雨遍八極
一洗為國憂民憂

為皮昭德題盧鴻十志圖

開元隱士微不起幽居寫入新圖裏境憐十景連十詠
路入幾山行幾里南州揮汗走黃塵展圖一見心先喜
吁嗟山中之人何所求未慚龐公不入州道行妻子兮
夏葛冬裘饑食芝朮兮猿朋鶴儔當時天下誰屬慮太
平自有姚宋流豈無嵩少後來者索價却重山人羞長

歌落筆生慷慨恍若風雨驚岩陬百年此意知獨會一
咲我欲從之遊

文泉為昌化陳晞仁賦

天目山深泉百丈觸石分流隨所向君今築屋向泉開
碧染波瀾浮几上霞章雲錦昊穹垂鯨力虹光滄海漲
神功奇絕造化遺渙以風行著文象匡廬瀑布三千尺
狂歌太白虛留迹何如對此興悠然吳箋寫盡不論錢
我聞故人客其處時與載酒同溪船攬衣欲訪當有約

為君先賦文泉篇

招張師夔畫古栢

張君善畫古松栢為我拂壁成孤株更研墨外放奇幹
忽然跨馬不受呼昂藏獨立孰與俱蒼髯紫甲何蕭疎
儼如猛士怒髮衝冠起又如神蛟挈雨獨傲風雷驅安
得蒼皮黛色三千丈氣勢兩高霄漢上脆蘂薄篠何足
觀歲晚江空屹相向張君張君來不來綺䟽寶幄休徘
徊青浮天目雲雨暗樂意豈復誇陽臺山靈戒勿勒駕

迴我當為君掃莓苔

積雨行

湖鄉暑雨連一月積水彌天無間隔青墩綠嶼遠人村
怒濤翻作蛟龍宅岸聲崩裂勢轟雷橫流暴比黃河決
拋妻委子豈復顧屋舍飄浮如敗葉偶攀高樹活須臾
却畏虫蛇上蟠結旁觀縮手抹無策慣弄扁舟猶膽怯
憶昔湖光千頃開十年波浪變塵埃山田枯皁民饑死
連雲擺耜生湖底貪夫徇利龍斷成廩粟紅陳多更累

新堤挾捷走蜿蜒盡塞河流功未已我嗟細民罹以哭
天道惡盈迺其理深耕易耨有常居偶爾偷生合高徙農
田使者重承宣疏流注海聖所傳何當少抑貪夫氣坐使
閭閻鼓腹太平世

次韻會陳華仲

山雨瀰漫弦望月坐嘆城闌路長隔雷聲裂地涌洪流
腥蜃一時離窟宅乘風作浪勢橫驅拔樹飄空隄碎決
青秧入望漫無垠數丈高原纔露葉人家聚立似雞栖

母泣兒啼百憂結策民誰復動愁思顧我安居心更怯
金烏側翅光莫開眼暗駒隙迷風埃青州不發饑且死
沈竈生蠹深見底嗟爾濺濺魚鼈區豈啻輕生危卵累
迎秋時晚穀重芽雨意只今殊未已真身沮洳同鹿豕
葦箔槎牙暫撐理却憐鷗鷺動成羣渺漠烟波隨所徙
老夫抱鬱辭稍宣愛君妙語真可傳飄然直負凌雲氣
會須持以名當世

次韻會吳子彥

歲寒軒中耿書月下俯喧囂市塵隔時有新詩更清發
絕似風流謝家宅雲歸疊嶂淨如洗雨過雙溪渾訝決
可怜多病別三秋欲買扁舟乘一葉庭垂書幌燕泥香
窗捲簾鉤蛛網結美人日莫殊不來翠袖天寒應自怯
相思何日咲顏開坐令白壁掃纖埃莫道長沙危謫死
一策治安窮蘊底漢庭千歲政多才徒見紛紛萬年累
黃金鑄就鼎中丹傲視東流流不已却來石上坐忘言
花落瑤琴誰共理清高正爾風雨斷脫屣垂巾不知徙

岩泉洞竹聲相宣
蓬萊歌舞青鳥傳
舉頭三峯藹雲氣
豈是桃源在人世

淮水流

淮水流流不已故人直在淮水源
招之不來幾千里嗟彼栖栖鴻舉
翮凌風起淮山何蒼蒼不與淮水
長山中虎兇政交橫水底蛟龍常
遁藏挈舟欲浮海海水不復迴却
上淮山望淮水旭日照見黃金臺
古今才俊多年少顧我衰顏慚再
來

濟州

充泗支流魯山麓會濟分河向南北扁舟高枕卧看山
青入齊雲雨新沐六年歸老敬亭閒忘却塵埃道路間
松聲入夢山岩裏驚散風帆去千里

送崔郎中之高麗

崔侯崔侯時之英位清上應列宿明雄藩給事詣公車
筦庫亦暫承恩榮冬官劇曹足才具聲價歛忽起羣卿
錦韉寶板摩劍佩玉駮東指開嚴程鴨江六月如火沸

赤雲日莫隨遐征蒼鷹飛去度遼海白鶴歸來棲故城
過家上塚重時思百年盛事誇簪纓賜環早晚馳四輦
金臺諸友期郊迎

醮晴行贈呂真人

皇天當夏雨連月后土雲陰晝常結南風蕭蕭動秋聲
潦溢行途人病涉釜中生魚竈產蛙林樹欹垂山慘惻
東郊二麥爛欲死數日不晴生事絕琳宮珠館壯神州
真人歛起為時憂霞衣蹁躑集羽流撾鐘考鼓嚴禱求

梁盛主幣薦芳羞寶函密奏徹宸旒飛符呪水喫九丘
呵叱蛟蜃投荒陬金烏側翅飛海上萬里霽天開治象
盈筐積廩富藏民生令鼓腹歌擊壤功歸真人謝不居
相君致此天人孚誰將盛事作畫圖執筆當效太史書

喜鵲來

喜鵲來查查鳴曉日兩雛從之飛啄我庭中食童子携
籠喚雛入雄雌查查鳴愈急今我開籠放雛歸鵲兮雛
兮隨爾適

題趙虛一山水圖

我愛青山欲歸去偶見生綃喜還住層巒疊嶂遠冥濛
旭日東生光采注簾陰微閃數枝丹疑是岩前半開樹
晴嵐曉翠千萬重一覽底須攜杖屨郭生十年不相見
筆意從容入天趣青田道人如瘦鶴能跨生駒窮海嶽
何如掛此素壁間終日焚香相對閒政爾胸中有丘壑
烏帽黃塵漫飄泊向來山中我醉眠白雲孤飛興悠然
清幽到處畫不出自遣數語人間傳

贈子虛居士

項生病起瘦如鶴日暖芝田饑不啄故巢林樹久蕭疎
直欲飛鳴上寥廓悠然白雲與徘徊美人招之殊不來
山中酒熟無時醒滄海揚塵何日盡

壽保定二尹先生

二翁九十生歲同蒼顏華髮如霜松友于二季執禮恭
亦以八表來相從子孫詵詵列章縫達尊詎止鄉所崇
太平涵照間氣鍾一門有此三代風世途得時才自雄

富貴瞬息浮雲空陳遵石奮漢顯融豈若盛事當時雍
國之壽俊羅羣公尹氏所貴咸吾宗人言茲瑞孰比隆
會見太史書無窮

奉朱澤民提學賦山水歌

朱子平生妙豪素開卷令人心目注千盤萬折各有殊
所向自得天然趣畫師紛紛何乃俗驂騑凋喪空凡肉
朱子客京師真作無聲詩想當礪礪經營時胷中政有
丘壑奇別來會吳門唐宋不足論長風高浪太湖雪疊

嶂重巒天目雲我家雲林在何許一咲煩君指其處就
買扁舟賦歸去

天厯元年初夏
書于姑蘇郡齋

雲林集卷三